

面且於都護府各置教養官畀以訓士之責又言西路驛路之殘弊請禁防禦使邊將乘駟之事上賜優批以為議處事令該曹稟處字牧之人唯患其不得人何必太拘於文武乎防禦使邊將之乘駟其來已久不可廢也○癸亥設行三日製居首人趙琰賜及第○御晝講○甲子御晝講○乙丑御晝講仍引見輪對官○丙寅御晝講○丁卯教曰今慶德宮承暉殿牆垣修改時有人枯骨不啻狼藉必是舊遠埋葬之地聞來不覺惻然骨雖朽矣予為民主其無顧恤之典乎茲用自製祭文以下其令該曹各別歛瘞仍為賜祭以表予意其祭文曰營殿既久而圯而毀穀朝是差載修載理仍舊恢拓承暉之北土役方張忍見枯骨嗟爾予魂幾閱年時無主無依不其餒而我為民主惻然何其爰命有司歛之瘞之賜以薄具用表予意感應不爽庶幾歆止○己巳夜有氣如火光○獻納李宇謙上疏請停承暉之役以敬天怒不納○引見大臣備局諸臣先是兵曹結束吏引捕盜軍官李枝勲及軍士入政院郎廳所在處裂紙窓而窺見之蓋翰苑廳直亦入於窺捕故也政院啓以為此無前之變請大將推考軍官及結束吏令攸司囚禁科罪乞之至是執義睦林重進啓請拿問定罪又以兵曹堂郎不能撿飭請推考又以政院之恬不為異經宿始啓請罷入直承